

学行典



學行典第一百九十卷

孝弟部名賢列傳十二

金 溫迪罕斡魯補

按金史孝友傳溫迪罕斡魯補西北路宋葛斜斯渾猛安人年十五居父喪不飲酒食肉廬於墓側母疾刲股肉療之疾愈詔以爲護衛

陳顏

按金史孝友傳陳顏衛州汲縣人世業農父光宋季擢武舉第調壽陽尉未赴值金兵取汴光病圍城中顏聞關渡河往省其父因扶疾北歸光家奴謀良不可誣告光與賊殺人光繫獄榜掠不勝因自誣服顏詣郡請代父死太守徐某哀之不敢決適帥臣至郡以其狀白帥曰此真孝子也遂併釋之天會七年詔旌表其門閭

劉瑜

按金史孝友傳劉瑜棣州人家貧甚母喪不能具葬乃質其子以給喪事明昌三年詔賜粟帛復其

終身

孟興

按金史孝友傳孟興蚤喪父事母孝謹母沒喪葬盡禮事兄如事其父明昌三年詔賜帛十匹粟二十石

王震

按金史孝友傳王震寧海州文登縣人爲進士學母患風疾刲股肉雜飲食中疾遂愈母沒哀泣過禮目生翳服除目不療而愈皆以爲孝感所致特賜同進士出身詔尙書省擬注職任

劉政

按金史孝友傳劉政洛州人性篤孝母老喪明政每以舌舐母目逾旬母能視物母疾晝夜侍側衣不解帶刲股肉啖之者再三母死負土起墳鄉鄰欲佐其勞政謝之葬之日飛烏哀鳴翔集丘木間廬於墓側者三年防禦使以聞除太子掌飲丞

王靈侑

按兗州府志王靈侑單縣人親沒哀毀踰禮廬於墓側朝夕負土慈烏巢於塋木詔表其門

### 胡德安

按兗州府志胡德安鉅野人狀元胡勵之子也勵仕金爲禮部侍郎因哀帝奔蔡城陷死之德安奉母渡河北至東平痛父死於非命朝夕悲哀事母至孝甘旨不缺鄉黨咸服其孝

### 胡祖廣

按鉅野縣志胡祖廣鉅野人性至孝友父母有疾侍奉湯藥晝夜不離側自禱于天求以身代與其弟祖實極相友愛每食必共人以爲難

### 元一 王閏

按元史孝友傳王閏東平須城人父素多資旣老盡廢之不甘淡薄每食必需魚肉閏朝夕勤苦入市營奉無闕父性復乖戾閏左右承順甚得其歡心鄉里稱焉父嘗臥疾夜燃長明燈室中火延籬壁間閏聞火聲驚起馳救火已熾烟燄蔽寢戶閏突入火中解衣蒙父抱而出肌體灼爛而父無少傷一女不能救遂焚死中統二年復其役



郭道卿

按元史孝友傳郭道卿興化莆田人四世祖義重至孝宋紹興間有詔旌之鄉里爲立孝子祠至元初內附閩盜起居人竄匿道卿與弟佐卿獨守孝子祠不忍去遂俱被執盜將殺佐卿道卿泣告曰吾有兒已長弟弱子幼請代弟死佐卿亦泣告曰吾家事賴兄以理請殺我道卿固引頸請刃盜相顧曰汝孝門兄弟若此吾何忍害兩釋之道卿年八十子廷煒爲建寧路平準行用庫使辭歸侍養道卿嘗病疝危甚廷煒憂瘁扶護一夕髮盡白有司言狀旌之

蕭道壽

按元史孝友傳蕭道壽京兆興平人家貧鬻箴以自給母年八十餘道壽事養盡禮每旦俟母起夫婦親侍盥櫛日三飯必待母食然後退就食至夕必待母寢然後退就寢出外必以告母許乃敢出母或怒欲罰之道壽自進杖伏地以受杖足母命起乃起起復再拜謝違教拱立左右俟色喜乃退母嘗有疾醫累歲不能療道壽割股肉啖之而愈至元八年賜羊酒表其門

郭狗狗

按元史孝友傳郭狗狗平陽翼城人父寧爲欽察先鋒使首領官戍大良平宋將史太尉來攻夜陷大良平寧全家被俘史將殺寧狗狗年五歲告史曰勿殺我父當殺我史驚問寧曰是兒幾歲耶寧曰五歲史曰五歲兒能爲是言吾當全汝家卽以騎送寧等往合州道遇國兵騎驚散寧家俱得還御史以事聞命旌之

### 張閨

按元史孝友傳張閨延安延長縣人隸軍籍八世不異爨家人百餘口無閒言日使諸女諸婦各聚一室爲女紅工畢斂貯一庫室無私藏幼稚啼泣諸母見者卽抱哺一婦歸寧留其子衆婦共乳不問孰爲己兒兒亦不知孰爲己母也閨兄顯卒卽以家事付姪聚聚辭曰叔父行也叔宜主之閨曰姪宗子也姪宜主之相讓旣久卒以付聚縉紳之家自謂不如至元二十八年旌表其門

### 芮世通 向存義 丁煦

按元史孝友張閨傳蕪湖芮世通十世同居峽州向存義汴梁丁煦八世同居州縣請於朝並加旌美

田改住 王佳兒

按元史孝友傳田改住汶上人父病不能愈禱于天去衣臥冰上一月同縣王佳兒母病臥冰上半月

甯猪狗

按元史孝友傳甯猪狗山丹州人母年七十餘患風疾藥餌不效猪狗割股肉進啖遂愈歲餘復作不能行猪狗手滌溷穢護視甚周造板輿載母夫婦共舁行園田以娛之後卒居喪有禮鄉閭稱焉

李家奴

管如林

朱天祥

按元史孝友甯猪狗傳潭州萬戶移刺瓊子李家奴九歲母病醫言不可治李家奴割股肉煮糜以進病乃痊撫州路總管管如林渾州民朱天祥並以母疾割股旌其家

畢也速答立

按元史孝友傳畢也速答立迷裏氏家秦州父喪廬墓次晝夜悲號有飛鳥翔集墳土踊起

尹夢龍



按元史孝友畢也速答立傳尹夢龍中興人母喪負土爲墳結廬居其側手書孝經千餘卷散鄉人讀之有羣鳥集其冢樹

### 樊淵

按元史孝友傳樊淵建康句容人幼失父事母篤孝至元十二年奉母避兵茅山兵至欲殺其母淵抱母號哭以身代死兵兩釋之三十年江東廉訪使者辟爲吏母亡奔喪哀感行路服闋奉神主事之起居飲食十年如平生臺憲交薦淵不忍去墳墓終不起賜褒表

### 賴祿孫

按元史孝友樊淵傳延祐間汀州寧化人賴祿孫母病值蔡五九作亂負母從邑人避南山盜至衆散走祿孫守母不去盜將刃其母祿孫以身翼蔽曰勿傷吾母寧殺我母渴不得水祿孫含唾煦之盜相顧駭歎不忍害反取水與之有掠其妻去者衆責之曰奈何辱孝子婦使歸之事聞賜褒表

### 劉德泉

按元史孝友傳劉德泉汴梁杞縣人早喪母父榮再娶王氏生二子居敬居元俱幼德泉甚撫之及



王氏病卒乃益相友愛至元末歲饑父欲使析居德泉泣止不能得乃各受其業以去久之父卒兄弟相約同爨和好如初縣以名聞表其閭

朱顯

按元史孝友劉德泉傳至治三年真定朱顯自至元閒其祖父已分財至顯念姪彥昉等年幼無恃謂弟耀曰父子兄弟本同一氣可異處乎乃會拜祖墓下取分券焚之復與同居縣以名聞表其閭

吳思達

按元史孝友劉德泉傳延祐閒蔚州吳思達兄弟六人嘗以父命析居思達爲開平縣主簿父卒還家治葬畢會宗族泣告其母曰吾兄弟別處十餘年矣今多破產以一母所生忍使兄弟苦樂不均耶卽以家財代償其逋更復共居母卒哀毀甚宅後柳連理人以爲友義所感州以名聞表其閭

朱汝諧

按元史孝友劉德泉傳朱汝諧濮州人父子明嘗命與兄汝弼別產子明卒汝弼家盡廢汝諧泣請共居仲父子昭子玉貧病汝諧迎至家奉湯藥甘旨甚謹後卒喪葬盡禮鄉人賢之州以名聞表其

閻

郭回

按元史孝友傳郭回邵武人素貧年六十無妻奉母寄宿神祠中營養甚艱母年九十八卒回傭身得錢葬之每旦詣墳哭祭十四年不輟州上狀命給衣糧贍濟仍表異之

孔全

按元史孝友傳孔全亳州鹿邑人父成病刲股肉啖之愈後卒居喪盡哀廬墓左負土爲墳日六十肩風雨有虧俟霽則補之三年起墳廣一畝高三丈餘有司請表異之

張子夔

按元史孝友孔全傳張子夔安西人父喪每夜半以背負土肘膝行地匍匐至葬所篩細土爲墳以有司所請表異之

陳乞兒

按元史孝友孔全傳陳乞兒歸德夏邑人年九歲母喪哀毀親負土爲墳高一丈廣十六步人憫其

幼欲助之則泣拜而辭以有司所請表異之

趙國安 張琛 李庭瑞 移刺伯顏 怯烈歹

按元史孝友孔全傳娥眉趙國安解州張琛南陽李庭瑞息州移刺伯顏南陽怯烈歹皆居喪有至行廬墓次負土爲墳並以有司所請表異之

楊一

按元史孝友傳楊一懷孟人至元間憐其叔清家貧密以分契詣神祠焚之與清同居者三十年無間言縣以事聞旌其家

張本

按元史孝友傳張本東昌茌平人篤孝事伯父叔父皆甚謹伯父嘗病本晝夜不去側復載以巾車步挽詣岱嶽禱之縣以事聞旌其家

張慶

按元史孝友傳張慶真定人善事繼母伯父泰異居河南慶聞其貧迎歸養之供膳豐備過于



所生縣以事聞旌其家

元善

按元史孝友楊一傳元善大名人父有昆弟五人因貧流散江淮久之遂客死至大四年善往尋其骸骨并迎弟姪等一十五喪而歸改葬祖父母以諸喪序列耐于塋次縣以事聞旌其家

趙毓

按元史孝友傳趙毓唐州人父福遷鄭之管城其先三世同爨毓官福州司獄滿歸以母老不復仕一日會諸弟泣申遺訓願世世無異處且祝天歃血以盟自是大小百口略無閒言同力合作家道以殷毓長兄瑞早世嫂劉氏守志毓率家人事之甚恭次兄選繼歿嫂王氏毓母以其少許歸改嫁王氏曰婦無再嫁之義願終事姑毓妹贅王佑佑亡妹念佑母無子乞歸王氏養之人謂孝友節義萃毓一家元貞初旌之

胡光遠

按元史孝友傳胡光遠太平人母喪廬墓一夕夢母欲食魚晨起號天將求魚以祭見生魚五尾列

墓前俱有嚙痕鄰里驚異方共聚觀有獺出草中浮水去衆知是獺所獻以狀聞於官表其閭

龐遵

按元史孝友胡光遠傳至順間永平龐遵母病腫三年不能起忽思食魚遵求於市不得歸途歎恨忽有鯉躍入其舟作羹以獻母悅病瘥

陳韶孫

按元史孝友傳陳韶孫廣州番禺人父瀏以罪流肇州韶孫年十歲不忍父遠謫朝夕號泣願從父不能奪遂與俱往跋涉萬里不憚勞苦道過遼陽平章塔出見而憫焉語之曰天子寬仁罰不及嗣邊地苦寒非汝所堪吾返汝故鄉汝願之乎韶孫曰既不能以身代父當死生以之歸非所願也塔出驚異以錢賞之大德六年瀏死韶孫哀慟見者皆爲之泣下肇州萬戶府以聞命遣還鄉里仍旌異之

李忠

按元史孝友傳李忠晉寧人幼孤事母至孝大德七年地大震郇保山移所過居民廬舍皆摧壓傾

地將近忠家分爲二行五十餘步復合忠家獨完

### 吳國寶

按元史孝友李忠傳吳國寶雷州人性孝友父喪廬墓大德八年境內蝗害稼惟國寶田無損人皆以爲孝感所致云

### 李茂

按元史孝友傳李茂大名人徙家揚州父興壽臨卒語茂曰吾病且死爾善事母茂泣受命奉母孟氏益謹母嘗病目失明茂禱於泰安山三年復明又願母壽每夕祝天乞損己年益母孟氏竟年八十四而歿居喪哀慟聞者傷之大德九年揚州再火延燒千餘家火及茂廬皆風返而滅事聞旌之

### 羊仁

按元史孝友傳羊仁廬州廬江人至元初阿朮兵南下仁家爲所掠父被殺母及兄弟皆散去仁年七歲賣爲汴人李子安家奴力作二十餘年子安憐之縱爲良仁蹤蹟得母於潁州蒙古軍塔海家兄於睢州蒙古軍岳納家弟於邯鄲連大家皆爲役尙無恙乃徧懇親故貸得鈔百錠歷詣諸家求



贖之經營百計更六年乃得遂大小二十餘口復聚居爲良孝友甚篤鄉里美之大德十二年旌其家

黃覺經

按元史孝友羊仁傳黃覺經建昌人五歲因亂失母稍長誓天誦佛書願求母所在乃渡江涉淮行乞而往衝冒風雪備歷艱苦至汝州梁縣春店得其母以歸

章卿孫

按元史孝友羊仁傳章卿孫蜀人本劉氏幼爲章提刑養子與母富氏相失三十八年遍訪于江西諸郡迎歸養之

俞全

按元史孝友羊仁傳俞全杭州人幼被掠賣爲劉儵家奴後獲爲良自汴步歸杭尋其母及姊得之事母以孝聞

趙一德

按元史孝友傳趙一德龍興新建人至元十二年國兵南伐被俘至燕爲鄭留守家奴歷事三世號忠幹至大元年一日拜請於其主鄭阿思蘭及其母澤國太夫人曰一德自去父母得全生依門下者三十餘年矣故鄉萬里未獲歸省雖思慕刻骨未嘗敢言今父母已老脫有不幸則永爲天地間罪人矣因伏地涕泣不能起阿思蘭母子皆感動許之歸期一歲而返一德至家父兄已沒惟母在年八十餘一德卜地葬二柩畢欲少留事母懼得罪如期還燕阿思蘭母子歎曰彼賤隸乃能是吾可不成其孝乎卽裂券縱爲良一德將辭歸會阿思蘭以冤被誅詔簿錄其家羣奴各亡去一德獨奮曰主家有禍吾忍同路人耶卽留不去與張錦童詣中書訴枉狀得昭雪還其所籍太夫人勞一德曰當吏籍吾家時親戚不相顧汝獨冒險以白吾枉疾風勁草於汝見之令吾家業旣喪而復存者皆汝力也吾何以報汝因分美田廬遺之一德謝曰一德雖鄙人非有利於是也重哀吾主無罪而受戮故留以報主今老母八十餘得歸侍養主之賜已厚矣何以田廬爲遂不受而去皇慶元年旌其門

王思聰

按元史孝友傳王思聰延安塞人素力田農隙則教諸生得束脩以養親母喪盡哀父繼娶楊氏事之如所生以家多幼稚侵父食別築室曰養老堂奉之朝夕定省愈久不怠父嘗病劇思聰憂甚拜祈於天額膝皆成瘡得神泉飲之愈後復失明思聰舐之卽能視縣上狀命表異之

徹徹

按元史孝友傳徹徹担古思氏幼喪父事母篤孝稍壯母沒慟哭頓絕水漿不入口者三日旣葬居喪有禮每節序祭祀哭泣常如祖括時年四十餘思慕猶如孩童每見人父母則嗚咽流涕人問其故曰人皆有父母我獨無是以泣耳至大三年喪異

王初應 施合德

按元史孝友傳王初應漳州長泰人至大四年二月從父義士樵劉嶺山有虎出叢棘中搏義士傷右肩初應赴救抽鎌刀刺虎鼻殺之義士得生泰定二年同縣施合德父眞祐嘗出耘爲虎扼於田合德與從弟發仔持斧前殺虎父得生並旌其門

鄭文嗣 從弟大和